

清、光緒三十二年刊本影印

各國立約始末記
(一)

清、陸元鼎編

華文書局股份有限公司印行

各國立約
始末記

光緒三十二年上海
商務印書館代印

我

朝與各國通市始於俄羅斯昔在

高宗許爲與國然觀康熙雍正乾隆三朝定約者三修約者一
皆謹守約束如奉條教故夫交聘往來之表列於史官
載書爾我之辭藏於盟府必自英吉利江甯之役始矣
俄初通市猶隸理藩院英再換約移於禮部咸豐辛酉
設總理各國事務衙門領以王大臣迨光緒辛丑復改
外務部合萬國之歡班六曹之上其事至嚴重於是外
務部印行各國通商條約爲國十有九在亞洲者二曰
日本曰韓在歐洲者十二自俄英外曰德意志曰法蘭

西曰奧斯馬加曰義大里曰日斯巴尼亞曰葡萄牙曰
比利時曰丹麥曰瑞典挪威在北美洲者二曰美利堅
曰墨西哥在南美洲者二曰秘魯曰巴西在非洲者一
曰剛果各國立約皆有所自起事變至萬大要有三戰
事將終款議旋始左執干戈右陳槃敦此一類也有挾
而求得請乃已雖未至戰而要非眞出於和又一類也
初訂新盟或尋舊約廣廈細旃從容商榷又一類也有
此三類是生五因有因他國之約而沿襲者而加甚者
而減讓者有因本國之約而引申者而翻棄者天津之
役英美俄法同時定約而遣使通商游歷傳教諸條大

略相同其前則瑞典其後則德意志以下亦大略相同
所謂沿襲者也各國凡涉外交爭相競進舉教案而言
始則黜守令償撫卹如西林之案繼則守令至遣戍撫
卹至鉅萬如天津之案繼則守令既譴上及大吏撫卹
不足別開專埠如曹州之案所謂加甚者也內地游歷
通商各國皆同而日本初約獨不入內地遣使駐京各
國皆同而美利堅初約獨不常駐京他如巴西西班牙
等與歐美他國頗不相同所謂減讓者也英吉利煙臺
之盟法蘭西越南之戰其在近事皆爲大端而煙稅併
徵重慶通市及滇緬分界一再申議皆滇案啓之滇桂

邊境遣使按行猛烏烏得諸地始允汾田之歸終於珠崖之棄專條方訂附款又增所謂引申者也日本修好條規行之數十年及馬關定約通商行船事多出歐美各國外者非廢初約莫逞夙謀朝鮮貿易章程亦行之數十年及光武建國別立條約懋置往事皆從改易所謂翻棄者也方其壇坫周旋筆舌互用篇爭一條條爭一語語爭一字彼國之使精神意氣恆有所注重當時任事諸臣專心壹志冀有利於

國家事變至急則不遑言利而但求稍損其害其精神意氣未始不相副乃既察幾審勢躊躇瞻顧而始著於篇

就其後而言或利既得而又失或害方起而不可以復止覆按成約其幾必有見於先者所謂成敗利鈍不可逆觀固若是其艱也元鼎自初釋褐作宰江南卽求讀各國條約通其大要是時總理衙門凡遇定約隨事印行俄約別爲彙刻曰會要曰續編每約必錄全文刻於直隸者保定曰類編天津曰類纂始以事類相次桐鄉勞氏節取二書事涉內地者曰纂要尤主簡約斷章取義意別有在最後刻於長沙曰分類輯要其書亦以類次而編輯既雜視諸書較遜歲辛丑元鼎布政蘇州發議最錄各國條約如總理衙門印行舊式備錄全文並

爲詳舉本事揭於篇首肇求約意附於條後勒成一書
以餉讀者乙巳春奉

命還撫江蘇而是書告成蓋凡五易春秋矣命曰各國立約
始末記卷以國次篇以年序都三十卷凡七十萬言海
內士大夫意在通知時務上備

國家折衝尊俎之用此書雖譾陋或亦堪資備攷儻能匡
謬補闕討論潤色成爲完書其亦將以是帙爲經學之
初詁史家之長編也夫

光緒三十一年夏六月仁和陸元鼎序

凡例

一本書編輯大旨一在宣究當時情勢以明立約之因一在研考各事沿革以爲用約之據

一各國條約或曰條約或曰和約或曰條款或曰條規或曰章程有所特重則有專條有所增益又有附款命名不一體裁則同外務部印本總題條約本書亦從其例一各國條約皆依光緒三十年外務部印本校正俄國界約依中俄約章會要及續編日本修好條規依當時頒行印本以補外務部印本所未備

一外務部印本俄始天津約日始馬關約舊約皆置不錄

今仍載入外務部本意主援引切要本書意主原委詳明舊約或全約作廢或某條更改並爲注明庶有參考之益而無誤引之弊

一章程有二其一兩國遣使會訂事鉅款繁類纂所謂條約章程是也其一亦兩國會訂而暫行一時專指一事類纂所謂章程成案是也本書於一時一事各項章程皆未錄入其爲外務部印本所載者則又未便割棄本有則有本無則無非自亂其例也

一東西各國凡與友邦訂立密約務從緘閱誠以軍國重事卽已事過時移亦不當宣布近人有錄報館傳鈔中

俄密約入所著書中者本書不敢蹈襲至或議而未成
成而未換雖有約稿亦均不列入冀毋貽誤

一每約之前述立約緣起依據當時

諭旨文牘無不信而有徵旁採私家著述兼及外人紀載必其
書久有定論其事又得他證方爲輯錄定約原奏尤資
考證傳鈔所得備載無遺

一東西各國訂立條約每述立約之意別爲一通與約相
輔本書如蒲安臣修美約自述旨要曾惠敏改俄約略
舉大凡均爲錄入其他或見之奏議或證諸函牘出自
定約大臣自可傳信亦均搜採至若旁觀評議後人揣

測皆未敢援據

一條約各款有與前後各約互爲損益因革顯然可考者亦均注明條後以便省覽惟各國條約大略多相同使必逐款加注未免繁而不綱茲特舉一二以示發凡

一通商公共章程外務部本錄入英國卷中今別出爲一卷新訂商約改易已多特存舊章以備考訂考證稍略職是之故

一各國新訂商約英美日葡四國先定以次編錄各國尙未全訂故特不加考證新訂海關進口稅則亦附於後一本書注重考證立約緣起復爲編次各國立約年月大

事表提綱挈領俾讀者易於瀏覽

一本書所錄各約均全篇備載惟欲因事求約或尙有所不便茲復依類標目爲各國條約分類表以資尋檢

一章程成案輯錄二十類將與本書並行茲聞袁宮保奏刻交涉文牘實已集其大成能讀本書者決不致無所參考置不復刻職是之故

一本書搜集編次任其役者桐鄉馮汝禧延雲秀水金兆蕃錢孫例得附書

各國立約始末記總目

仁和陸元鼎編

卷首上

各國立約年月大事表

卷首下

各國條約分類表

卷一

英吉利上

卷二

英吉利下

卷三

法蘭西上

卷四

法蘭西下

卷五

俄羅斯上

卷六

俄羅斯中

卷七

俄羅斯下